

Ata umwezi wa sita, imalayika Djiburilu iwelehwa na Mungu hari mwa dago la Galilaya lihiriwao Nazareti. Iwelehwa ha mutrumushe-mwanamutsa arumidziwa na mutru wa udjama wa Daudu, akohiriwa Yusufu. Dzina la umwanamutsa mutrumushe uwo lika Mariama.



Badi imalayika imuambia: «Usuriye Mariama, mana udjañliwa neema mbeli za Mungu. Vulishia, utsomira, udze mwana mutrubaba, utsomuᵛa lidzina la Insa. Waye atsoka mutru muhole, atsohiriwa Mwana wa Monyewe Uju rahana Uju. Mwalatru Monyezi-Mungu atsomuᵛa ishiri ya ufalume ya Daudu, babahe. Atsotawalia umuraba wa Yañkubu ha daima, na utawalizi wahe

kautsokana mviso.»



Sa ile Mariama adzisa malayika ile:
«Trongo zizo zitsorendreha jeje, na
wami tsaparojua mutrubaba?»
iMalayika imudjibu: «iRoho
Ndzitwaharifu itsohujilia, na
ushindzi wa Monyewe
Uju rahana Uju
utsohuṽishidza ha
umuvuli wawo. Iyo
de imana umwana
mutwaharifu uwo
atsodzalwao,

atsohiriwa
Mwana wa
Mungu.»



Hari mwa suku zile kamwe, Mariama
alawa, andre ha uharaka hari mwa
dago milimani mwa
iYudeya. Angia
dagoni ha
Zakariya,
amusalimu
Elizabethi.




Vale, Elizabeti ukia yahe lisalamu la Mariama, mwana wahe agudzuha mimbani hahe, na Elizabeti ajadziwa iRoho Ndzitwaharifu. Bas, sa ile ha ji lendza nguvu arongoa: «Ubarikishiha hari mwa watruwashe, na itrundra ilio mimbani haho, ibarikishiha!»



Tsini inamuna umudzalio wa Insa-Kristi waja. Mayahe Mariama aka arumidziwa na Yusufu. Badi kabula ya wao ufungia, adzipara na hamili yaja ha ushindzi wa iRoho Ndзитwaharifu. Mutsumba wahe Yusufu, iᵱo aka mutru mwendza imani, kakotsaha amupatsa aĩbu ha hadhwira; aãzimu ulisha trumidzo lahe ha siri.



Iḽo akofikiri trongo ile, malayika ya Mola imujilia tsindzini, imuambia: «Yusufu, mwana wa Daudu, usuriye umurenga Mariama ake mushe waho, mana umwana amumira, aja ha ushindzi wa iRoho Ndzitwaharifu. Atsodza mwana mutrubaba, na wawe utsomuhira Insa, mana waye de atsohuyio umati wahe na madhambi yawo.»



Yusufu umaruha yahe v̄ale, afanya zile imalayika ya Mola yamuãmurisha, amurenge mutrumushe wahe wake v̄umoja. Badi kalala na waye ata mupaka adza mwana mutrubaba alio amba amuhiri dzina la Insa.



Hari mwa uwakati ule, Kaiswara Augusti atoa ãmuri
vufanyiwe hisabu ya piya uwakazi wa zitsi zatawaliwa
na Romu. Bas, piya uwatru
wakwendra wadziangihe,
kula moja hari
mwa lidago lahe.



Ha izo, Yusufu wajau alawa Nazareti ya iGalilaya ha uendra Yudeya hari mwa lidago la Daudu lihiriwao Baitilham, mana waye aka mutru wa umuraba na wa udjama wa Daudu, pare aangihwe



vumoja

na mutsumba wahe Mariama, akana hamili.



Uka yawo hule, wakati
wa Mariama udza
uwaswili.



Aja adza mwana wa handra wahe, mutrubaba.
Amuṽambia nguo, amuladza moni na shiya
ya zahula za zinyama, mana
kawaka wapara
bandza moni na
inyumba ya
wadjeni.



Na mukabala ule v̄uka watsunga-mabaribari wakoketsi
tobe, ile mauku wagogeye mabangwe yawo. Wakati ule
malayika ya Mola ija iwāvenushia na
utukufu wa Mola

uwawalia,
ata
waremwa
na faza bole.



Badi malayika ile iwaambia: «Mwasuriye, mana nisumujudzani habari ndjema itsovingiao furaha bole umati piya. Mana leo ini, hari mwa lidago la Daudu, mudzaliwa

Muhuyifu,
ne de
Kristi, Rabi
watu.»



«Na ini itsoka ãlama hanyuju: mutsopara mwanazaza aṽambiwa shitamba, aladzwa moni na shiya ya zahula za zinyama.»



Sa na isa ile, imalayika ijiliwa na dunia nyengi ya shi mbinguni, tsenā zakomusifu Mungu na urongoa: «Natukuzihe Mungu hari mwa yimikabala ya uju rahana



uju, na amani
shiṽandreju mwa
tsi ha wao
awaṽa fadhwila.»



Wakati malayika zile zawabaushia
amba zirudi mbinguni, watsunga wale
waambiana wao na wao: «Narendre
Baitilham, raone trongo yahidjiri oho,
iyo Mola arijudzayo.»



Bas walawa, ha uharaka wandre hule, wamupara
Mariama na Yusufu, vumoja na umwanazaza ule
aladzwa moni na shiya ya zahula za zinyama.

Baanda wamuona, warongoa trongo
waambilwazo zapatana na
umwana ule.



Insa adzalwa dagoni
Baitilham hari mwa iYudeya,
wakati Hirudu aka mufalume.
Na v̄ale de mataālamu wa
nyora walawa
mashiriki,

waja dagoni Yerusalemu,
wadzisa: «A haṽi umwana
adzalwa amba de umufalume wa
yaMayahudi|Mayahudi? Mana
riono nyora yahe mashiriki,
de raja rimusudjudiye.»



Basi Hirudu ahiri mataālamu
wale sirini, awatafiti hari mwa
uwakati inyora ile yaṽenuha.
Amwesa awaṽeleha
Baitilham ha uwaambia:
«Namwendre mwadzise ha
udhibitifu zahusu umwana
uwo. Mwamomupara,
namunijudze, ile wami wajau
nendre namusudjudiye.»



Baanda wakia umufalume, walawa. Na inyora ile waka
waiona mashiriki, iwakilia mbeli ata yamolingana na
v̄ahanu umwana ule aka, izia.
Wangia moni na inyumba,
waono umwana na mayahe
Mariama. Sa ile wavundzu
malondro,
wamusudjudia.



Amwesa wabulia midzo yawo, wamutamania zawadi:
dhahabu, udi, na marashi ya miru. Ivo wafahamishiwa
hari mwa ndzozi wasumuregeye
Hirudu, warudi tsiju hawo ha
udunga ndzia yangina.



Baanda mataãlamu walawa
v̄ale, malayika ya Mola imujilia
Yusufu tsindzini, imuambia:
«Hima, urenge umwana na
mayahe, utrale wendre
Miswiri. Baki oho ata
namohuambia, mana
Hirudu atsozunguha
umwana pare amuule.»




Bas Yusufu ahimi, arenge
umwana na mayahe uku,
wandre Miswiri. Abaki hule
ata Hirudu afu, ile zini zaka
zarongolwa na Mola ha
ndzia ya mutrume,
zitsimidzihe: «Tsihiri
umwana wangu
alawiye iMiswiri.»



Wakati Hirudu afahamu amba
mataãlamu ya nyora wale
wamuperea, akasiriha ha
kusudi, ata atoa watru wandre
waule piya wanatsa watrubaba
wakana maha mili ushuka
dagoni Baitilham na mabavu

yalo,

...




... ha utunda mitsa-mitsa uwakati aka aambilwawo na mataãlamu wale.



Baanda Hirudu afa, malayika
ya Mola imuvenushia Yusufu
tsindzini Miswiri, imuambia:
«Hima, urenge umwana na
mayahe, urudi hari mwa itsi
ya Israila, mana wale
wakotsaha waule
umwana, wafu.»



Badi ukia yahe
amba Arkelausa aka
arengelibandza



la babahe Hirudu
ha utawalia iYudeya,
ariyi ondroketsi hule.



Na ha īvo
afahamishiwa hari
mwa ndzozzi, alawa
andre hari mwa libavu
la Galilaya,

andre aketsi hari mwa
dago lakohiriwa Nazareti. Basi v̄a v̄o
trongo ini yaka yarongolwa na yimitrume
itsimidziha: «Atsohiriwa Munazareti.»



Mana Mungu aendze uulemengu,
ata aña uMwana moja-moja wahe,
ile pare kula amuaminio asupare
uangamifu wa dahari, badi
akane uhayati mukamilifu
wa daima.



MAROMU 3:23

Mana piya waãswi, basi walatsishiwa na utukufu wa Mungu.

MAROMU 6:23

Mana muliõo wa dhambi ðe ufa, badi ineema yadjaãliwa na Mungu ðe uhayati mukamilifu wa daima hari mwa uũumoja na Kristi-Insa, Rabi watru.

MAHEBRANIYA 9:27

Na mauri ðe inamuna yahetsiwa ha mwanadamu amba afe mara moja, iõo hukuma ije.

MAEFESO 2:8,9

Mana ha rehema ðe mwahuyiwa, ha ndzia ya uaminifu. Na iyo kaisuja ulawa hanyuju, badi iyo ðe ineema ya Mungu. Na iyo kaisi ata hata ha zitrendro, ile v̄usuke ata mutru ajua udzibua.



MAROMU 10:9,10

Mana neka ukubali ha ihanyo yaho amba: «Insa de Rabi», tsena neka uamini rohoni haho amba Mungu amuregeza hayi ulawa ha uwafu, vavō utsohuyiha. Mana uamini ha iroho, de ijao na muhakisho, na ukubali ha ihanyo, de ijao na uhuyifu.

YUHANI 3:16,17

«Mana Mungu avendze uulemengu, ata avā uMwana moja-moja wahe, ile pare kula amuaminio asupare uangamifu wa dahari, badi akane uhayati mukamilifu wa daima. Mana Mungu kavēleha uMwana wahe ulemenguni amba auhukumu uadhibilwe, badi ulemengu uhuyiwe ha ndzia yahe.



1 YUHANI 5:11-13

Na ushahidi uwo de amba Mungu ariwa uhayati wa daima, na uhayati uwo uka hari mwa uMwana wahe. Monyewe ukana uMwana, ana uhayati; uwo kasina uMwana wa Mungu, kasina uhayati. Tsimuangishiani zini pare mujuwe amba muna uhayati wa daima, wanyu muaminio ha lidzina la uMwana wa Mungu.



MATIYO 1-2; LUKASI 1-2

Storyline by: Edward D. Hughes

Illustrated by: M. Maillot
and Alastair Paterson

Adapted by: E. Frischbutter; Sarah S.

Comorian, Maore Bible (swb) © 2021, Wycliffe Bible
Translators, Inc. All rights reserved.

[https://scriptureearth.org/00i-
Scripture_Index.php?idx=2126&language=Shimaore&iso_
code=swb](https://scriptureearth.org/00i-Scripture_Index.php?idx=2126&language=Shimaore&iso_code=swb)

©2024 Bible for Children, Inc.

www.M1914.org

www.bibleforchildren.org

